

阿文成公年譜

阿文成公年譜卷三十一

受業

王

昶勸定

第三子孫那彥成恭纂

盧蔭溥增修

乾隆五十一年丙午七十歲

二月十八日

上巡幸五臺

命出京辦事並兼管戶部印鑰

四月初六日

諭曰大學士阿桂著馳驛前往清口籌辦河工事務

初九日

諭曰前據李奉翰奏桃汎長發黃水高於清水四尺餘寸  
又復倒漾入口將攔清壩仍舊堵築此事甚厯憂慮已  
遣阿桂前往會同熟籌辦理茲復詢據阿桂奏稱現在  
黃水倒漾恐浮沙漾入引河是以復將攔清壩堵築俟  
黃水消落清水長發再行啟放等語今藉黃水濟運出  
於無奈之下策淮揚一帶運河日久必致淤墊實屬不  
成事體但目前權宜之計不得不藉以浮送重運朕思  
毛城鋪王營減壩俱爲伏秋大汎宜洩黃河盛漲之用  
此時若將該二處開壩啟放則黃水自見消落清水卽

可暢出於漕運或較爲有益若此時黃水已落清水暢出固可不必也著傳諭李奉翰先行詳悉履勘具奏並著阿桂酌量情形據實奏聞

十二日

公奏言查毛城鋪王營減壩二處均係預備分洩黃水盛漲之路從前毛城鋪啟放之時居多至於王營減壩則非黃強淮弱異常盛漲不敢輕易開放卽啟放亦多在伏秋大汛雖當黃水盛漲而淮水亦不至甚弱一經啟放將黃水掣低清水卽可以暢出刷沙濟運於正河仍無妨碍上年七月黃

水異漲河臣李奉翰等亦將毛城鋪王營以及各處減壩概行開放維時因清水過弱又通湖五道引河曾律受淤是以各該處開座雖經開放分洩而清水仍不能外出濟運臣抵清口後與李奉翰等再四公同熟商不得已爲蓄清禦黃之計彼時曾測量大河水勢並據道將等開報九月初旬各處河水尺寸內徐城水誌在一丈以內老壩工水誌存水一丈九尺餘寸及臣十月起程回京時徐城諸椿僅存水六尺而老壩工誌椿仍未消動徐城居老壩工上游該處誌椿旣見消落何以老壩

工反未消水推原其故自由上年黃水旁洩之路過多而王營減壩又逼處老壩工之上驟經開放抽掣正河水勢未免因之迴流水緩沙停河底淤墊消落較遲受病未必不由於此是以臣於回京前告知李奉翰等將毛城鋪王營各等處減壩一律堵閉俾黃流合併東趨以期刷深淘底昨據李奉翰奏本年桃汎徐城誌椿長至六尺八寸老壩二誌椿除底水外實長水七尺餘寸等語是老壩工長水較之徐城亦不過七尺餘寸所高僅有尺許可見該處河底自各開壩堵閉後現在河身較

之上年九月淘刷已深此河流宜合不宜分之明  
驗也現因桃汎長發清口倒漾復藉黃水濟運實  
出於無奈之下策若將毛城鋪王營減壩開壩啟  
放使黃水消落清水暢出於目下漕運自爲有益  
但恐啟放後水勢旁洩河底又不免淤高而王營  
減壩與老壩工及清口尤近設該處河底再加淤  
墊將來伏秋盛漲不能暢順東注不特清口更易  
倒灌兼恐上游各處不無意外之虞以臣愚見此  
時王營減壩似未便開放設黃水一時不能速消  
或將毛城鋪暫行啟放該處距老壩工及清口較

遠尙可不至大有妨碍現奉

諭旨令李奉翰先行詳悉履勘具奏該督接奉後自必酌量形勢勘籌妥辦臣於清口雖曾往來經過數次而於倒漾情形上年甫經目睹其究竟如何辦理設法補救之處未能確有把握容俟到彼後與李奉翰虛衷商確並遍加採訪再行據實具奏奏入諭曰昨又據李奉翰奏來似可不致大費周章總之汝到彼自當盡心調劑也

十六日

諭曰據李奉翰奏桃汛已過黃水消落清口現高一尺三



寸先將太平河攔湖壩工啟放壩門拆寬三丈二尺湖  
內清水暢出直注流行迅疾重運遄行無滯等語覽奏  
欣慰太平河攔湖壩工既經啟放清水暢出已可藉以  
抵黃其迤西之天然等四引河朕意此時且暫行堵閉  
俟伏汎盛漲之時再行開放俾清水力旺於敵黃濟運  
較爲有益是否可行著阿桂會同李奉翰酌量情形據  
實具奏再此時清水暢注糧艘固無虞稽遲但黃水消  
長無定必須隨時料理阿桂親承訓諭有應面行告知  
李奉翰者且善後事宜亦須熟籌妥辦阿桂仍須親赴  
清口會同講求辦理現在該處只有李奉翰一人恐頭

緒紛繁照料不到阿桂至彼爲之主持商同籌畫俟諸  
務料理妥協卽行起程於朕起鑾巡幸熱河以前來京  
亦不遲也

十七日

公奏言伏查清口倒漾總由於淮水常弱黃水常  
強黃高於清清水不足相敵遂致倒漾入口此次  
桃汎黃水長至七尺餘寸高於清水四尺餘寸致  
復倒漾然桃汎長水易於消落不比大汎爲日較  
長茲據李奉翰奏現在桃汎已過黃水漸消往後  
再落尺餘清水高於黃水攔河壩工又可啟放等

語就此而觀臣未抵清口前湖水諒已暢出該督

接奉

硃批知

聖明爲此愁悶一經啟壩自必迅速馳奏仰慰

聖懷臣奉

命前往目下已入東境自應仍赴該處再加履勘將倒漾  
之病悉心體察是否祇能隨時補救視消長以爲  
蓄洩抑或前人辦理別有屢試屢效之成法可以  
仿照而行並前清口西壩仰蒙

聖明指示酌議添設木龍能否挑溜得力之處與李奉翰

等當面籌酌并遍加訪詢先行詳悉具

奏再回京面陳情形恭候

訓示奏入

諭曰茲已啟壩清水暢出朕懷暑慰屢有旨諭但尙未得  
透雨依然愁盼

十八日

諭曰昨據李奉翰奏先將太平河啟放之處辦理尙屬妥  
協若將迤西引河暫行堵閉則清水力旺於運道河工  
更有裨益嗣後每年屆期俱可照此永遠遵辦俾黃流  
益慶安瀾而清水長資濟運豈不甚善再閱舊存河圖

內中河口迤下有淤沙一處已用硃筆記出黃水與清水在高家馬頭交匯東趨該處正當頂衝遇此淤沙勢必回漚南行易致黃水倒灌現在伏秋大汛未過難以施工俟將來水退歸槽時究須將此處淤沙挑挖俾河流遶行迅駛不虞頂阻倒灌斯亦欲清上淤先疏下淤之一法也至對岸兜水壩處所向有老淤一段正可藉以逼漚下趨且以助兜水壩之勢自當仍存毋動著將原圖寄與阿桂等會同閱看籌酌是否可行詳悉據實覆奏

十九日

諭曰本年桃汛旺盛黃水漸致倒漾當經李奉翰將攔湖  
壩工堵閉爲蓄清禦黃之計但現在湖水已高於黃水  
一尺三寸且近日淮安一帶雨水霑足湖水自必口漸  
增長昨廬鳳道王懿德來京引見面據奏稱安徽鳳潁  
各屬雨澤優渥現在祈晴等語是該處爲淮水上游洪  
湖水勢更當旺盛設遇西北風鼓盪高家堰石工豈不  
著重高堰爲淮揚保障關係非淺著諭阿桂到彼會同  
李奉翰詳悉察看裴家場等四引河酌量於何時啟壩  
現在洪湖水勢較前是否增長究與高堰石工有無妨  
碍之處查明據實覆奏

二十八日

公偕李奉翰奏言伏查洪澤湖尾閘引河五道原以濟運抵黃水大全開宣洩水小酌量攔蓄本係隨時相機辦理前於啟放太平引河之後清水外出已足濟運因其力尙未旺盛是以迤西之裴家場等四道引河壩工仍未敢卽爲啟放原以畱待湖水盛旺時開放分洩以爲敵黃之計今查洪湖內高堰誌椿前經長至四尺九寸

臣

李奉翰已附摺奏

聞嗣又加長二寸現存五尺一寸自係上游雨水加增所

致但連日淮水尙未大發堰圩石工計高出水面  
一丈三尺餘寸卽較向年五壩過水之時亦尙少  
三尺四寸無虞風浪撞掣茲臣等復公同籌酌目  
下湖水已蓄存五尺一寸向後若再大加增長至  
七尺以上力足抵黃刷沙卽應將裴家場等四道  
引河次第啟放以資宣洩若所長尙在七尺以內  
五壩未至過水仍應遵照先奉

諭旨將裴家場四道引河暫行堵閉俾清水力旺一放不  
可遏抑於敵黃濟運兩有裨益兼可藉以攻沙刷  
深河底臣李奉翰惟有凜遵



訓諭隨時察看情形相機妥辦既不敢使湖中之水存蓄過多有碍高堰石工亦不敢輕易分洩致不能一舉有成以期仰副

聖懷至圖中中河口迤西淤沙一處正當交匯頂衝之處易於回溜南行該處淤沙時見增長時見汕刷上下本無一定而河中有此攔阻水勢究不能暢流此時伏秋瞬息水底無由施工一俟大汛過後水退歸槽如該處淤沙尙未刷除卽當遵

旨實力挑挖俾河流迅駛遄行以免阻碍其彭家馬頭兜水壩處所老淤一段正可藉以逼溜下趨毋庸挑

去奏入報

聞

公偕李奉翰閱鶚元又奏言竊照江省清口因三月望後桃汎黃河水漲高於清水致復濊入臣阿桂奉

命前來與臣

李奉翰會同籌辦四月初八日自京起程時

值黃水漸次消落清水仍高於黃水

臣

李奉翰等

於

臣

阿桂未抵江省以前已將太平引河壩工開

放俾清水外出濟運

臣

阿桂於二十日馳抵桃源

次早乘船渡黃由清黃交匯處所直至通湖五道

引河各處詳細履勘目下高堰誌椿存長水五尺一寸清水由太平引河放出分爲兩股一股出清口會黃因清水力弱尙未足以抵禦一股流入淮揚運河流行頗爲迅駛本年重運糧船共三千二百六十二隻扣至四月二十三日已渡黃一千五百四十七隻按日核算五月內可以全行渡竣斷不至復有阻滯但溯查四十八九等年高堰水誌三四月分均止存水四尺以內前年冬底誌椿長水已消落無存上年五月中旬以前湖水尙能外出濟運迨五月下旬黃河水長始形倒漾至七月

河水異漲直灌入湖又值湖水過弱五道引河會  
律受淤清水遂涓滴不能外出今年三月高堰誌  
椿存水四尺六寸嗣陸續加長共存五尺一寸何  
以桃汎黃水甫長卽行漾入此時黃水已消而清  
水仍不足資禦臣阿桂悉心體察並與臣李奉翰  
及各道將等將上下游開報水誌逐一比較現在  
徐城水誌僅五尺八寸迤下邳睢宿虹各汎存水  
亦不過八尺上下至桃源卽有九尺二寸老壩工  
竟有一丈五尺餘寸雖向來大河水勢下游深於  
上游而臨黃迎溜處所埽前之水更深老壩工誌

椿係在埽前然亦不應該處所存獨多至七尺餘寸推求其故緣上年七月黃水異漲倒灌入湖時臣李奉翰等慮及湖心淤墊兼之山海各工在在報險不得已將王營以及各處減壩啟放原爲急則治標救護堤工起見無如去年夏秋湖水竟未長發是以黃水陡落而清水無出老壩工適處王營減壩之下開放抽掣大河溜勢未免稍緩流行不能迅駛以致河底稍墊河水既高清水益低水爭高下遂致易於倒漾是以臣阿桂前在途次業將此時王營減壩未便卽行啟放緣由據實具奏

但欲治清口之病必先知老壩工以下河身之淤  
墊欲去河身之淤墊必先掣低黃水使清水暢出  
以水攻沙不勞人力而自治目下清水尙未十分  
旺足不足以資衝刷現在之太平引河僅敷浮送  
重運所有迤西之張福口等處四道引河應遵照  
諭旨暫行堵閉以蓄高清水之勢其通湖引河雖已於上  
年寬展挑挖尙當再加挑挖寬深俟至淮水大漲  
高堰誌椿存水七尺以上彼時再將王營減壩開  
放使河水暢洩掣低黃水時隨將通湖五道引河  
盡行啟放庶清水全力出口逼黃東注老壩工一

帶河身可以大資其滌刷從前乾隆三十九年黃  
水倒灌時卽係如此辦理可以仿照而行臣等再  
四計議今年王營減壩勢在必須開放卽開放之  
時亦必應在湖水大長之後方可以不煩再舉一  
切概復舊觀惟是王營減壩固可以減老壩工以  
上之河水而老壩工以下之河底此番已稍覺墊  
高亦屬現在黃河之病但水底撈淤徒費無益惟  
當使之暢順歸海則河流遄行迅駛自可刷沙淘  
底無虞頂阻倒灌是尾閭尤關緊要伏讀

諭旨以欲清上游先疏下游仰見

皇上至聖至明於全河局勢無不洞中肯綮查從前雲梯關外卽係海口百十年來關外漲成沙地海口距雲梯關已有三百餘里之遙黃水至此再無關束勢不能如前迅速消納但此數百里浮沙旣不能效前人築隄束水之法若集夫疏浚無論潮汐往來勢難駐足且萬夫之所挖不敵一湖之所壅臣李奉翰臣閱鶚元聞知雲梯關下二套堤外地方爲北潮河歸海之路乾隆四十一年二套堤工衝開四十一二兩年黃水曾由彼入北潮河尾歸海與現在海口並行二年彼時上游各工頗屬穩順



而現在海口亦並未稍淤維時因馬港堤工未築  
恐淹及安東民田隨於四十三年仍行堵閉臣阿  
桂於四十五年奉

命前往查勘海口時曾親履其地亦知該處入海形勢較  
爲徑捷况現在馬港已建堤工既無慮民田淹浸  
卽自二套以至北潮河中間河形於四十三年堵  
閉後亦間段淤塞然較之挑挖河底其減省奚啻  
十百倍是此時疏浚下游莫若於二套迤下開挑  
引河於大汎時開放使多一分洩之路則上游自  
更暢達下注若慮河不雙行現在海口日久恐致

淤墊新河或至奪溜但奪溜必在河形衝刷寬深  
之後若果衝刷寬深將來黃水竟全掣由茲東注  
則該處海口較現在海口既近二百餘里且并無  
淤沙改作海口更可得久遠之利臣等再四籌商  
並遍加訪詢參考已試成法外此實無別策謹將  
清口以至二套各處河形繪圖貼說進呈恭候

聖明訓示其如何開挑引河之處臣李奉翰已派委熟諳  
工程之道將人等前往先行詳細勘估如蒙

允准卽趕緊施工限於大汛以前如式挑竣奏入

諭曰據阿桂等奏現在清水未旺所有張福口等處引河

遵旨暫行堵閉其王營減壩今歲必須放開但應在湖水大長之後方可不煩再舉並擬將雲梯關下二套地方開挑引河於大汎時開放改作海口更可得久遠之利等語雲梯關外旣已漲成沙地海口距關甚遠以致下游壅阻黃水倒漾勢不能不爲改圖今關外二套地方爲北潮河歸海之路形勢較爲徑捷若開挑引河於大汎時開放或能衝刷寬深黃水竟以全掣由茲東注則相距海口較近自屬最便亦祇可如此辦理但朕所慮者不在清口而在高家堰蓋盈虛消息理有固然黃水清水強弱情形往往迭爲消長連歲黃水盛漲清水

弱極將來清水必有旺盛之時高堰所關非細恐李奉翰等狃於年來清水弱小於高堰一帶堤防工段或稍存大意設遇清水盛漲猝不及備尤不可不豫爲慮及不可拘於蓄清之說也阿桂將此切囑李奉翰務須先事熟籌公同商確慎之又慎毋致臨時周章方爲妥善至現在二套地方開挑引河黃水多一分洩之路自可暢達下注但將來衝刷寬深後若無隄防關束恐大汛盛漲時河流散漫水緩沙停仍不免有舊時淤墊之慮阿桂等不可拘泥惜費之見應詳晰察看該處情形相機妥協以爲久遠萬全之計

五月初三日

諭曰昨據阿桂奏到清口河道流通糧艘無虞阻滯其挑  
濬二套引河於估定工段酌立章程後原可交與李奉  
翰等妥辦浙江虧空一案關係緊要阿桂於接奉此旨  
卽行速赴浙省會同曹文植等徹底查辦庶主持定見  
能仰體朕意妥協辦理不蔓延亦不疎漏方可至寶光  
龍摺內所稱盛任上年進京攜資過豐外間頗有煩言  
又督臣過往嘉興嚴衢上下游地方供應浩繁門包或  
至千百兩等語此事大有關係不可不嚴切查究福崧  
盛任與阿桂毫無瓜葛富勒渾雖係阿桂族孫阿桂斷

不致稍存回護之見致負委任此事總俟阿桂到浙後  
會同查照寶光龍原奏逐款嚴訊據實覆奏再阿桂到  
浙後可前往海塘詳悉履勘所有范公塘原定緩工二  
千九百餘丈已據曹文植等奏請停止是否無庸辦理  
足資保護之處將實在情形親往履勘據實覆奏阿桂  
回至淮徐想卽伏汎時矣亦可使中詳看面奏不爲無  
益

十二日

公偕李奉翰奏言前奉

諭旨指示於清口新建西壩添設木龍能否挑濶得力令

臣阿桂與臣李奉翰酌量辦理查黃河頂衝迎溜處所恐汕刷堤根每於堤外安設木龍以資保護從前開放陶莊新河後恐大溜仍向南趨曾於順黃壩以上添設木龍三座以下添設木龍一座數年以來溜走北岸順黃壩三座木龍前均已沙淤至清口東西二壩關係蓄洩機宜最爲緊要一遇淮水漲發卽爲大展清口以便暢洩若於該處安設木龍則將來淮水增長拆展時轉多未便臣等覆加履勘所有新建西壩處所似可毋庸添設木龍奏入報

聞

公偕閔鶚元李奉翰又奏言竊照洪澤湖兩年以來所存底水較小力弱未足抵黃臣等僅將太平引河開放分洩濟運其迤西之裴家場四道引河遵

旨暫行堵閉以資收束奏奉

諭旨以清水極弱之後必有旺盛之時盈虛消長之理總宜慎之又慎毋致臨事周章益仰

聖明睿慮精詳永當奉爲法守查湖水現已漸次加長臣等查看通湖五道引河原估並展挑丈尺至寬之



處不過七八丈窄處止四五六丈不等尙覺窄狹  
出水不能甚暢今臣等酌議將各引河原寬七八  
丈者應再展寬二三丈原寬四五丈者應再展寬  
五六丈各以十丈爲度其天然河張家莊裴家場  
三道引河會總處應展寬以二十丈爲度並照現  
在河身一體挑深隨令道將詳加確估核計應挑  
土方實需銀一萬八千六百餘兩臣等現在專委  
裏河廳營並幹練汛員分段趕挑以備清水加長  
開放時益爲有力可以抵黃刷沙設遇盛漲宜洩  
亦愈加暢利則高堰石工更可無慮此洪湖內亟

應辦理之工至黃河歸海之路臣等前經奏蒙

聖鑒於二套地方開挑引河該處在雲梯關以外由北潮河歸海形勢實爲便捷委令道將等詳細丈量應挑引河長八千八百三十丈口寬自二十丈至十五丈十二丈不等底寬十丈至六丈不等按照河形高下挑成建瓴之勢深至七八尺至一丈二尺不等共估土六十一萬六千九百餘方內乾土十二萬九千七百餘方淤土四十三萬七千四百餘方稀淤四萬九千七百餘方按河工則例乾土每方給銀八分淤土給銀一錢三分六釐稀淤給銀

一錢五分查該處地近海濱人烟稀少今興挑此河必得尅期趕辦完竣以備大汛水長開放非尋常挑工可比需夫衆多爲期甚迫附近既無應募之夫上年各處歉收糧價昂貴倍於往昔必得隔屬僱募人夫遠處購辦夫米運至工次應用方能  
有濟若按照定例所給土方價值實屬不敷辦理  
臣等公同籌酌惟有仰懇

皇上格外天恩於例給方價每錢之外加銀五分在窮民  
藉工趁食足敷餬口自必樂於趨事而要工亦可  
如期告竣  
臣等按照所估丈尺土方合之加增方

價計算共需銀十一萬五千九百九十餘兩又河  
頭應築攔河河尾應築攔潮各柴壩估銀六千餘  
兩臣等因工程緊要分作十二分臣李奉翰臣閔  
鶚元派委幹練河廳六員附近州縣六員分段承  
挑專委淮揚道師彥公淮安府伊轍布駐工催辦  
其展挑通河各引河專委河庫道司馬駒就近催  
辦臣李奉翰仍於各該工往來督催均限開工後  
四十日報竣工完再爲逐細驗收不使稍有偷減  
草率奏入得

旨如所議行

公偕李奉翰奏言伏查高堰石工爲淮揚保障所關甚鉅從前山旰廳屬建立五壩時以八尺五寸爲度者蓋因高堰誌椿長至八尺五寸五壩始行過水若在八尺以內堰頂尙出水有一丈以外不致著重無庸亟籌分洩連日湖水漸長臣阿桂親至高堰查勘誌椿現存長水五尺六寸較前日具奏時已陸續增長五寸水面寬大與臣阿桂去冬查勘情形迥不相同然距五壩過水之時尙少二尺九寸其高堰壩上於乾隆四十九年

南巡時仰蒙

聖明親臨閱視令將堰後土戣一律增高與堰頂相平崇  
墉屹立更足以資抵禦就目下洪湖水勢而論高  
堰石工無虞風浪撞激但盈虛消長之道誠如

聖諭理所必然連年清水弱極將來必有旺盛之時是以

臣等前奏俟高堰誌椿長至七尺以上卽酌量情  
形將裴家場四道引河次第開放茲復公同商酌  
並悉心體察如大汛以前黃水尙未增長清水先  
長至七尺以上勢在必當宣洩是其力已足敵黃  
卽應將裴家場四道引河開放俾清水暢出刷沙  
無庸復開王營減壩如清水長至七尺以上黃水

尙高濇口不能暢出卽應一面開放王營減壩一面開放裴家場四道引河使黃水掣低清水暢達以爲因勢利導之計如大汎以前高堰誌椿長水總在七尺以內或長至七尺以上而堰工並未著重實可放心今年節候較遲卽又不妨待至六月中旬以後羅時新挑二套引河及展寬五道引河工程均可一律完竣一俟汎水見長卽將裴家場等四道引河全行啟放並遵

旨開放王營減壩俾清黃交滙處不致壅遏爲患下游再加以新挑二套引河減洩歸海黃水掣清有路湖

水益能暢順會黃東注不特堰工不致著重卽老  
壩工以下河底兼可大資滌刷是不待再舉而清  
口一帶概復舊觀自更妥善臣阿桂於接奉

諭旨後切囑

臣

李奉翰務須慎之又慎斷不可執蓄清之

說致有猝不及防之慮至新擬開挑之二套引河  
臣等本因現在海口距雲梯關較遠且關外現無  
隄工收束以致淤出沙地水勢散漫不能如前迅  
速歸海是以又於二套分籌去路今蒙

聖諭以該河將來衝刷寬深後若無隄防關束恐大汛盛  
漲時河流散漫水緩沙停仍不免有舊時淤墊之



陳文公全集卷三十一  
慮令臣等不可拘泥惜費之見應相機妥辦以爲  
久遠萬全之計仰見

聖明洞悉河防無微不至臣等不勝欽佩查黃河以束水  
攻沙爲上策善後隄防最關緊要但新河必須經  
歷伏秋大汛衝刷過後其寬深丈尺方可作準今  
擬開挑二套引河原備大汛時黃水多一分洩之  
路於刷深老壩工以下河底及上游工程有益若  
竟衝刷寬深黃水全掣由茲入海更爲便捷據道  
將等稟稱該處俱係沙淤易於衝刷是以原估挑  
寬係在十五丈以內臣等尙恐其衝刷未能得力

又加估寬二十丈至十餘丈深七八尺至丈餘不  
等然卽刷寬至數十丈而大溜未能全掣亦尙未  
成河難以預定隄防應俟挑工完竣開放過水如  
果衝刷寬深掣溜成河形勢漸定則善後之計自  
應講求查此河開向在東北邊海灘地勢較昂無  
虞散漫卽將來需建隄工止須足資攔禦不必過  
高其西首一帶地勢較窪從前未築馬港隄工以  
前安東境內民田難免倒漾漫淹自修建馬港隄  
工以後西首一帶已不致漫淹然爲築隄束水之  
計則尙嫌其稍遠今先將挑起河土於西岸堆築

子堰酌攔水勢大汎經過一兩次察看情形倘漸見衝刷寬深大溜有全歸新河之形再行

奏請建築隄防庶不致虛糜

帑項奏入

諭曰據阿桂奏現將二套口開挑引河並展挑通湖五道引河各事宜詳細會商勘定交李奉翰等照估興挑其敬閉蓄洩各機宜亦與李奉翰面爲講求無可畱江籌辦之事卽於初七日起程回京等語前因浙省虧空一案關係緊要傳諭阿桂卽行速赴浙省會同曹文植等徹底查辦約計阿桂於初八日接奉此旨後自當仍往

浙省現在畱京無事且已派伍彌泰代辦阿桂到浙後  
會同曹文植等將寶光龜原奏逐款詳悉訊究不必蔓  
延亦不至疎漏方爲妥協至阿桂於浙省各事宜審辦  
完結回至淮徐想卽屆伏汎時再行順便履勘收工並  
將修防事宜與李世傑李奉翰講求籌辦回京面奏更  
爲有益

十三日

公奏言竊

臣

因江省河務大局商定無需

臣

畱江

籌辦奏明於初七日起程回京是日酉刻桃源途  
次接奉

上諭令臣速赴浙省臣遵卽回至清口於初八日起程赴

浙容俟到彼再會同曹文埴等詳悉查辦伏思各省倉儲庫項有無虧短總以收支文冊月日爲憑而清查虧空則又以現在實存銀米及穀價爲據亦一定不移之理今竇光鼐所奏仙居黃巖等七縣前任知縣等虧缺數目俱得自後任及署事者告知該學政臣抵浙後惟有仰體

聖意妥協查辦以期無濫無縱至臣與福崧盛任毫無瓜

葛卽富勒渾係臣無服族孫臣受

恩深重亦不值爲之稍存迴護致負

聖明委任奏入報  
聞

十五日

諭曰前據孫士毅奏富勒渾向伊索取廷寄因係密諭不敢將覆奏摺稿給與閱看卽疑怒交作始則詰伊在京或有異言繼則以近來陛見祇有舒常穆騰額二人必居其一等語富勒渾身爲總督縱容家人在外招搖婪索滋事今查辦貲財至數萬之多凡爲臣子者苟有見聞無不可指名叅奏茲因舒常穆騰額先後到京經朕面加詢問俱各據實陳奏隨降旨令孫士毅密行查辦

始據查出伊家人殷士俊等骫法營私情弊富勒渾惟  
當痛自慚恨又何顏怒及舉發查辦之人似此居心行  
事不僅有乖大臣之體更爲昧盡天良其不是甚大著  
傳諭阿桂俟解送富勒渾到浙時將此情節嚴切訊問  
據實覆奏勿得稍存諱飾所有孫士毅奏片著抄寄閱  
看

六月初七日

公偕曹文植姜晟伊齡阿奏言

臣

阿桂先後欽奉

諭旨令查浙省倉庫虧缺彌補未完銀兩穀石茲據顧學  
潮詳稱各州縣現存庫項穀價共銀一百五十三

萬三千五百三十五兩有零於本月二十五日以前掃數解齊到庫另行置貯稟請盤驗前來臣曹文植等帶同司員前赴藩庫盤點抽兌相符臣等隨公同將新舊卷宗冊檔通盤悉心詳核實未彌補銀二十五萬三千七百三十五兩零核之上年冊報三十三萬餘兩之數較爲減少惟查浙省虧空原奏約計一百三四十萬兩蒙我

皇上格外施仁自四十七年予限彌補迄今已閱四載遲逾未楚未便再滋寬緩以致庫項久懸查倉庫現有虧缺者計三十縣所有四十七年以後歷任知



縣不能趕緊彌補數全完固有應得之咎應請  
自四十三年王亶望在任之日起截至本年五月  
爲止查明各該縣歷任知縣除病故及緣事查抄  
各員外其升任他省本省回籍者與現任知縣一  
體按照在任月日將現在虧缺銀數均勻勒賠統  
於一年以內盡數清款其現在浙省者以奉

旨之日爲始已離浙省者以文到之日爲始並查取各該  
員職名除本年到任各員外餘俱革職暫行畱任  
停止升調丁憂告假在籍之員停其銓補應賠之  
項咨行原籍勒追依限完繳始准開復如逾限不

完分別草職草任卽照虛出通關本律治罪其無  
倉庫虧缺但有例不准銷應補銀兩及已買未交  
穀石之現任各員均降三級暫行畱任本年到任  
者免其議處定限於十月以前均令彌補完全准  
其開復如逾限不完卽草職離任應補銀穀仍於  
各名下勒追其有能趕緊彌解司庫者查明隨時  
咨部扣除謹將各縣倉庫虧缺等款數目并酌擬  
善後章程分繕清單恭呈

御覽一地丁耗羨正雜錢糧於本年二八月兩次開徵所  
徵銀兩陸續批解司庫次年五月奏銷始行解齊

雖屬年清年款惟核其起解銀兩之時已在次年  
新錢糧開徵以後若有侵蝕挪用者難保無以新  
抵舊情弊且恐徵收不力民欠過多因畏避處分  
互相挪掩上司既無從察其底裏久之卽成虧缺  
臣等現在清釐庫項通查新舊徵收錢糧調查流  
水號簿分晰核計以防弊混應請嗣後每屆五月  
奏銷錢糧之期務將本年二月開徵至五月新收  
錢糧一併儘數報解司庫庶可杜挪新掩舊之弊  
至各州縣有因公例准動支之項應卽指定於何  
項內動支申報各上司存案藩司卽隨時分別酌

撥歸款不得稍任懸宕致滋弊混一定例州縣交代若前官虧空後官容隱不報出結接受至本身離任始稱前任虧空者將欠項追賠外仍治以贍徇私受之罪又倉庫收受錢糧等物不足虛出通關者計所虛之數以監守自盜論此次清釐之後前後任接收交代務須按照定例辦理倘前官稍有虧空卽據實舉出如有贍徇搪代者一經發覺卽按虛出通關律治罪監盤之員從重議處一現在新舊州縣交盤有將物件輾轉流抵交代之事查庫項錢糧

新舊交代時前任如有畱交物件接任之員情願  
畱用者卽自行出價不得入於交盤抵款違者除  
將流抵之數於本員名下追賠外交部議處一常  
平倉存貯穀石原以備歉收之年及青黃不接時  
放賑平糶之用其放賑平糶之穀例於豐年如數  
買補還倉又穀石貯倉年久恐致霉變許令出陳  
易新者卽隨時買補今浙省倉穀現缺二百餘萬  
石大率由於平糶出陳易新穀石買補歸倉並無  
定限致輾轉因循僅有穀價存貯自應酌定限期

章程以清弊竇而歸一實貯應請嗣後凡補買倉穀如係春夏出倉之穀卽於本年秋收後如數買補如係秋冬出倉之穀准於次年秋收後如數買補未經買補之前毋許出陳易新春糶秋糶若實遇荒歉年分應行平糶者臨時特詳酌辦至穀價業俱提貯司庫每縣現在穀石自數百石至萬石不等應按其缺穀之數多寡酌量年歲之豐歉由藩司核定買補數目詳明巡撫定限統於五年內如數買足歸倉不得再任因循致倉項稍有虧缺一州縣平糶穀價向來於糶竣後僅將盈餘銀兩解

司其糶價俱貯縣庫出入皆由州縣自主致有侵  
挪之弊嗣據湖南巡撫陸燿在山東藩司任內察  
知其弊酌議糶存穀價俱令寄存司庫倉糧穀價  
俱得實在等因奏准在案自屬絕弊之良法應令  
各直省督撫嚴飭各屬嗣後務遵照奏定章程實  
力辦理違者叅處至穀價銀兩業已提貯司庫各  
州縣買補穀石若仍令赴省領銀採買不惟輾轉  
需時卽腳價用度亦未免煩費應令該縣每遇採  
買時詳明撫藩卽於本年新徵地丁錢糧內劃抵  
以歸簡便其上年錢糧應仍令於五月奏銷以前

照例儘收儘解不得於此內割抵一各州縣買補倉穀是否實買實貯非道府親往查驗不足以昭覈實應請嗣後各州縣買補倉穀按數買足後責成該管道府於每年盤查時將買補數目一併出具切結咨詳院司存案如有捏飾據實揭辦巡撫藩司倘有因公經過之便再行抽盤稍有虧短除將該州縣嚴叅辦理外并將隱匿瞻徇之道府叅處奏入

命軍機大臣會同該部議奏

二十三日



諭曰前據李奉翰奏洪澤湖水逐日加長高堰誌椿長至七尺三寸通湖五道引河倍加展挑寬深已開之太平張福兩道引河宜洩頗暢本日毓奇奏淮揚運河水勢深通惟河口仍屬黃強清弱淤沙梗阻自初八日起至十七日止僅拉過台州前幫船十隻渡黃北上等語如此挽渡伊於何底况此時清水旣長仍不能暢出敵黃刷沙濟運推原其故究係上年借黃水以送回空朕卽以爲無異引賊入室浮沙淤墊河底漸高清水頂阻不能暢出其受病實由於此朕心甚爲焦慮此時富勒渾等將次解送到浙阿桂於審辦完竣後迅速回程至清

口一帶與李奉翰等詳悉講求爲之主持定見於事自  
更有益現在作何設法籌辦俾重運不致稽遲之處著  
傳諭阿桂熟思審計據實奏聞

二十五日

公偕曹文植伊齡阿奏查訊盛任並無收受餽贐  
之事報

聞

公奏言臣奉諭履勘海塘於審辦事件之暇同尙  
書臣曹文植撫臣伊齡阿親往沿塘詳細履勘查  
浙省海塘自章家菴至老鹽倉一帶乾隆四十五

年我

皇上親臨閱視

命建石塘四千九百丈四十九年又蒙

聖明指示將柴塘石塘所空溝槽填土種樹俾柴石兩塘  
合爲一勢卽以舊有柴塘爲垣水表裏完固其章  
家菴迤西至范公塘一帶續奉

諭旨一律添建石塘內章家菴以西石塘工尾起至范公  
塘迤東

硃筆圈記處止二千一百一十丈形本灣兜又有上游桐  
廬各處山水自南而來該處適當其衝是以原定

添建時卽列爲急工至范公塘以西

硃筆圈記處烏龍廟一帶二千九百三十丈原定添建時

卽列爲緩工茲

臣復加察看該處老土塘從前建

築卽向東北以漸收進而老土塘迤西之江塘又  
自北斜向東南建築挑溜南趨該處民人復於老  
土塘之外添築土塘一道卽名范公塘層層攔禦  
目下頭圍以下溜勢漸開不特范公塘廬舍桑麻  
鬱然在望范公塘外沙塗亦有寬至千餘丈者詢  
之在塘年久之弁兵等僉云數十年來從未見有

剝動等語

臣親加履勘旣非

硃筆圈記以東水勢直抵塘根者可比此一帶大溜亦無  
漸次逼近之勢就臣目今所見情形所有原定石  
塘緩工二千九百餘丈應照曹文植等前議暫行  
停止將原定急工二千一百二十丈內已經開工  
之一千五百丈及未經開工之六百餘丈均卽接  
續興建再將外衛之柴工透過石塘工尾往西接  
續二三百丈並遵

旨於

硃筆圈記處塘外添築挑水大石塘一座實已足資保護  
至於塘外沙塗坍漲無常卽如此次山水漲發緊

對此一帶南灘坍去甚寬若向後常得南坍北漲  
塘工離水益遠自是極好機會北岸現有沙塗雖  
從未見刷動倘大溜漸有趨近之勢應交與撫臣  
伊齡阿隨時畱心察看將來有須改建石工之處  
再據實

奏明一律改建奏入得

旨如所議行

七月初三日

公偕曹文垣奏言寶光鼐所奏平陽縣知縣黃梅  
丁憂演戲一節查係黃梅爲伊母慶九十生日演

戲伊母適於是日身故奏入

諭曰寶光飛並不確細訪查冒昧陳奏著飭行

十一日

諭曰據李世傑等奏清口一帶初三四等日大雨滂沱異常傾注黃河北岸李家莊湯家莊等處先後漫溢該督等惟應上緊購備物料堵築各漫口並實力撫卹被水災民至河水消耗糧艘淺擱尤關緊要該督尤應會同毓奇設法辦理俾尾幫尅期趲渡北上以期依限抵通所有本日所降諭旨及李世傑等原摺著抄寄阿桂閱看於審辦富勒渾一案完結回至清口彼時漫口自己

合龍就緒阿桂當親至該處與李世傑等熟商會勘於  
善後事宜更爲有益

十五日

諭曰本日續據李世傑等奏司家莊烟墩又有漫口之事  
湖河局面大變著將原摺及所降諭旨一併抄寄阿桂  
閱看

十六日

諭曰昨據阿桂等奏到查訊富勒渾等供詞各摺已降旨  
令其速行嚴訊定擬具奏矣看來富勒渾之罪重在勒  
派口岸書吏銀兩一節按其派繳及勒令書吏出結奏



請充公各月日其爲先侵後吐形跡顯然富勒渾亦百  
喙難辭阿桂等卽可就此定案至鄭一桂致送金葉一  
事現在殷士俊及鄭一桂堅供並非送富勒渾之物亦  
並可就此定供不必再行推求富勒渾用度奢侈貪圖  
安逸平日任用家人招搖婪索佯爲不知且沿途經過  
地方尙有致送金葉之事則富勒渾於閩浙任內必另  
有營私納賄情弊但其平日屬員中曾經逢迎餽送者  
各知與受同罪此時誰肯說出若再輾轉追求則蔓延  
無已亦非朕不爲已甚之意且富勒渾久任督撫習於  
侈靡金葉五十兩爲數無多伊若婪索必不止此其爲

餽送殷士俊之物尙屬可信阿桂等卽可就現在質訊  
明確各款速行定擬具奏現在江南清口一帶黃運並  
漲先後漫口數處而司家莊漫溢處所湖河連成一片  
運河周家莊一處關係漕運經行現在江西尾後幫船  
在彼淺攔此二處尤關緊要此時李世傑等目覩漫溢  
情形未免心存惶懼必須有人爲之主張方能於事有  
濟著傳諭阿桂速將富勒渾一案定擬完結發摺後卽  
先行速赴清口會同李世傑等辦理堵築事宜以期妥  
速藏功俟大局已定再來舒常卽押帶富勒渾等案犯  
解京交與刑部收禁再赴行在復命曹文垣卽由杭州

回籍省視伊母侍養十餘日再行起程

閏七月初八日

諭曰據常青奏派員將雅德解赴浙江於七月十五日自福建起程等語此時雅德自己解到其罪惟在代爲欺隱始終回護此外亦無可審訊之處著傳諭阿桂等速將此案定擬完結發摺後阿桂卽赴清口會同履勘商辦該處自啟放二套引河後溜勢暢順河湖二水日見消落大局已定阿桂止須將堵築事宜與李世傑酌定章程交與該督等妥速辦理卽行起程前來於萬壽前趕到行在復命亦可無須在彼久稽也

初十日

公偕曹文垣奏嚴審富勒渾觔法營私縱容家人各款跡及徇私曲法並不據實直陳之雅德等情罪確實分別定擬斬候奏入

命軍機大臣會同三法司覈擬

十五日

諭曰阿桂於初三日自浙起程杭州至清口計程一千餘里七八日可到何以李世傑等於初十日發摺時阿桂尙未到彼或係伊瘡疾發動不能進行或係渡江守風耽擱甚爲廛念著傳諭阿桂遇便據實覆奏

二十六日

公偕李世傑李奉翰書麟奏言臣連日會同臣李

奉翰臣書麟親至桃源安東等處上下履勘查本

年江省黃河漫口共有四處內烟墩口門雖二百

二十餘丈而水勢極緩需料無多數日內即可堵

合斷流李家莊口門雖寬三百六十餘丈現在水

勢亦緩逐漸掛淤口門下深處不過七八尺較之

湯家莊司家莊漫口易於辦理止須於有水處用

料堵合無水處與烟墩漫口均於補還原堤之外

再鑲做邊埽並建築挑水壩數座挑涵南趨新工

已足資保護其湯家莊漫口寬二百五十餘丈水深二三丈不等雖不免分大河之漚然口門之下水深亦止有八九尺至一丈不等而湯家莊以下正河水深二丈一二尺三丈二三尺不等斷無虞其奪漚至司家莊漫口寬二百七十餘丈水深二丈五六尺該處漚勢流入口門者較多然大河水勢惟距口門相近處所稍淺以下正河水深仍有六七尺至一丈不等先經臣李世傑等奏請於對岸顧家莊灘上拙挑引河引漚北趨並於西壩先行進占挑漚歸入正河則大河水勢自見增長而

口門既有分洩壩工亦不至著重且漫口迤南有砂岡一道黃水至此爲之遏阻不能穿入湖中又值湖水現仍旺盛彼此相抵是以黃流祇能循張福口引河與湖水相並挾沙而行不致淤湖所有湯家莊李家莊司家莊三處口門均已盤鑲裹住亦無虞復有塌寬之事因思司家莊漫口就現在形勢於大局本無妨碍但該處卽與洪澤湖毗連恐往後湖水漸消究不免濁流漾入自應遵

旨首先僭堵擬俟物料運送到工核計續運之料可資接濟於本月內卽先將司家莊漫口開工興築再俟

料物稍充卽派員分築李家莊漫口各處料物源  
源運到於堵築司家莊李家莊漫口敷用時湯家  
莊漫口亦卽趕緊進築堵合所有漫口水淺處所  
可用柴土鑲填者約計九月初十前後卽可完竣  
其水深處所先用船隻捆紮輾箱俟口門以漸收  
窄水勢湍急再相機下埽於迅速之中務期穩實  
按日計工總可於九月內一律完竣斷不任復有  
遲逾以上各漫口堵合後於補還大堤外並添築  
越堤以爲重門保障其毛城鋪天然峯山祥符王  
營等閘壩並茅家堤引河現已次第堵閉務使黃



流併力東趨以冀刷深河底至清口以下直至會  
黃河口深通暢達已復舊規高堰誌椿現尙存水  
一丈一尺五寸但目下節過白露水勢消多長少  
不可不預籌收蓄查山盱五壩分洩之路統計共  
寬三百二十丈應速行堵閉已定於本月二十五  
日開工限二十日堵竣其東清禦黃二壩向來拆  
展至寬時東清壩不過拆至五六十丈禦黃壩不  
過拆至一百一二十丈本年因湖水異漲兩壩既  
全行拆去東清壩口門現寬一百十五丈禦黃壩  
口門現寬二百零八丈卽運口頭二三壩亦被水

衝刷無存現在束清禦黃兩壩壩基以前水深二  
三四丈不等水勢既深壩工全用柴鑲做以期堅  
實未便仍照往年於霜降後始行辦理自應與運  
口各壩趕緊堵築俾資攔蓄已定於八月初一日  
開工限四十日完竣計兩壩收窄之時上游司家  
莊壩工亦漸收窄黃水逼歸正河其流入張福口  
引河者自必漸減則清口各壩均可按照定制察  
看高堰誌椿存水尺寸酌畱口門不使多有消耗  
如此預爲收蓄不特現在司家莊漫口之水有所  
頂托免致漾入湖中而湖水充裕兼可備明春敵

黃濟運之用至江西重運於十六日已全過周家莊口門二十一日掃數渡黃北上目下水勢大定所有運河各漫口除碧霞宮周家莊二處已經堵閉其五孔橋二井等處亦卽分別堵閉補還原堤務於回空船隻未到以前全行完竣以利緯挽且水勢歸入河槽卽周家莊以下運河內間有淤沙未經淨盡之處并可藉資衝刷深通其楊家莊運口頭二三壩亦卽補築收束不使中運河之水或有過耗

公偕李世傑李奉翰書麟又奏言徐揚兩屬黃運

湖河前於六七月間大雨連旬上游水發異常盛漲處處盈堤拍岸當將毛城鋪天然閘蘇家山滾壩峯山四閘祥符五瑞二閘王營減壩並下游高郵之南關車邏五里中新等壩次第啟放四路分洩而來勢湧急徐城誌椿仍長至一丈三尺五寸外河老壩口誌椿仍長至二丈三尺洪澤湖高堰誌椿仍長至一丈六尺三寸驟而且大而且久兩岸水高堤頂均經搶築子堰攔禦今水落後查勘各處堤工經此大水刷掣殘缺甚多臣阿桂自浙江前赴清口復至桃源安東一帶上下履勘亦

見黃運各河堤工實多有卑薄缺損之處伏查豫省新堤上年經河東河臣蘭第錫河南巡撫臣畢沅會摺奏請加培仰蒙

皇上發帑興修一律高厚堅整今歲經臨大汛安鞏無虞南河地處下游衆水匯歸一切堤工每年風雨淋漓車馬蹂踐易於剝蝕向止加高五寸僅抵漕艘往來犁纜剝削不能會律加修此番異漲固屬僅見之事但兩岸堤工旣覺卑矮兼多殘缺若不奏請增卑培薄將來水勢甚大仍屬可慮臣等公同商酌督飭淮徐道康基田淮揚道師彥公按照七

月初旬盛漲水痕先行分別擇要撙節估計茲據  
該道等面稟徐屬豐銅邳宿桃五廳黃河兩岸土  
工約估需銀十三萬餘兩揚屬外河山安海防三  
廳黃河兩岸土工約估需銀十一萬餘兩裏河兩  
岸及揚河揚糧江防等處土工約估需銀六萬餘  
兩其高堰山圩一帶臨湖大堤爲淮揚兩郡保障  
最關緊要節年仰荷

聖恩將石工改砌加高堤頂修培寬厚靠後加築子埝今  
歲湖水如此異漲堤工得以保護穩固淮揚數州  
縣億萬生民莫不感頌

皇仁詠歌

帝澤其堰吁舊石工并運口吳城等處磚工內伏汎以來  
間有浪掣數十段每段長數丈及十餘丈不等又  
高寶邵伯一帶今秋湖河連成一片西岸臨湖石  
工爲風浪所擊亦多坍卸雖經委員隨時撙護將  
來亦應一律修補完整庶資捍衛約估需銀四萬  
餘兩均奏入

諭曰據阿桂等會奏查勘溫江口水勢情形分別先後酌籌  
堵築並將收蓄事宜豫行籌定一摺諸凡皆妥如所議  
行已於摺內批示矣至呈片摺奏稱黃運兩河卑矮隄工

應行加培高厚及臨湖浪掣石工應行修補完整約估需銀三十四萬餘兩一摺修築隄岸原所以爲河濱民生永資捍衛豈可惜費但期實工實料庶幾帑不虛糜該督等務勉力爲之母使工員稍滋浮冒

二十七日

諭曰據寶光鼐奏親赴平陽查出黃梅以彌補虧空爲名計畝派捐每田一畝捐大錢五十文又每戶給官印由單一張與徵收錢糧無異又採買倉穀並不給價勒派錢文蒞任八年所侵吞部定穀價與勒捐之錢計贓不下二十餘萬並據各生監繳出由單印票收帖各檢一



紙呈覽等語前據伊齡阿奏寶光鼐回省攜帶生監多人以爲質証舉動顛狂且恐煽惑人心啟訐抗告官之漸是以降旨將寶光鼐拏交刑部治罪今觀寶光鼐所奏又似黃梅實有勒派浸漁之事且有由單印票借票收帖各紙確鑿可據若不明白辦理不但不足以服寶光鼐之心且浙省現值鄉試生監雲集衆口藉藉將何以服天下輿論此事關係重大不可不徹底根究以服衆懲貪阿桂現已起程在途接奉此旨仍著回至浙江秉公審辦此時寶光鼐業已由浙起解阿桂於途次遇見卽將伊帶回浙省以便質對此案若止派阿桂伊受

朕恩爲大學士自不肯心存迴護但究係原審之人著  
添派閔鶚元會同審辦

八月初一日

諭曰阿桂前在浙省查辦今復令其前往斷不可仍執前  
見稍涉私嫌惟當以朕之心爲心逐款秉公研訊俾貪  
員劣蹟一一審出置之重典所謂懲一可以儆百政體  
國法必當如此阿桂想必與朕同心也至阿桂於途次  
遇見寶光鼐時卽遵昨旨寬其鞫問解去刑具告以朕  
意帶往浙省隨同查辦並著阿桂接奉此旨卽速兼程  
行走朕惟計日以待也

初三日

諭曰據阿桂覆奏接奉諭旨卽於山東平原途次回程前赴浙江查辦黃梅貪黷各款一摺所奏俱與朕相合朕因此事數日以來屢懷不置阿桂等到彼時惟當秉公查審無難得其實在底裏現在寶光鼐查出之印信圖記字帖卽係黃梅捐派確鑿證據阿桂等到彼卽就此嚴切審究其虛實真贋無難立辨惟在阿桂等虛衷研鞠耳

是日公七十壽辰

諭曰阿桂現在清江會商辦理堵築事宜未免稍需時日

卽起身回京已過生日之期所有賞賜物件著畱京王大臣卽傳伊子入內祇領

恩賜

御書匾額平格延祺

御製聯句耆筵錫慶高千叟雲閣銘勲贊上台盆如意絨結頂帽朝珠補褂蟒袍貂皮等物

九月初二日

諭曰阿桂於審辦此案完竣回程至行在覆命時計已屆朕出哨之期卽可同胡季堂辦理勾到事宜

初六日

陳文忠公年譜卷三十一  
諭曰蘭第錫奏請拆建閘座一摺內稱八閘內有六里石  
閘一座爲韓莊德勝兩閘擎托之關鍵閘牆蟄裂多有  
塌卸且過於低矮閘底高於河底應較舊製加高並請  
移在舊基以上數丈另建等語六里石閘既經坍塌閘  
底淤高該督酌請移建自爲便漕起見但如此辦理是  
否於河道裨益及移在舊基以上是否足資擎托之處  
著阿桂於浙省審案完竣回京時順道至該處會同蘭  
第錫親行查看於蓄洩機宜更有裨益

十七日

公偕閔鶚元奏言嚴審寶光龜所叅平陽縣知縣

黃梅勒借派捐各款均確實請

旨卽行正法奏入

命軍機大臣會同該部議奏

二十五日

公偕蘭第錫奏言臣阿桂於十九日過臺莊臣蘭

第錫亦至該處會同履勘八閘金門俱令下板測量水勢深淺以定河底高下自韓莊至德勝張莊閘一帶地勢建瓴湑急直下不能停蓄向於德勝張莊兩閘中間添建六里石閘一座以資擎托原製砌石九層高一丈零八寸視上下兩閘低至六

尺水小則收束濟運水大則漫壩順流於停蓄宜  
洩均有裨益乾隆四十六七兩年黃水經行全閘  
浸泡水中椿木灰縫多有損裂又因四十九年運  
河加深挑挖該處閘底高於河底以致閘底石面  
多已掀揭現在測量長河水深四尺六寸金門石  
底水深止三尺五寸舟行至此不無墊擱之虞自  
應將閘底落低二尺其自金門以下亦因底高跌  
落日深竟有至九尺餘寸者原舊閘基已成深塘  
難以釘椿安石必須於舊基以上數丈之內另行  
後建於形勢亦益無更改至臣蘭第錫原奏內所

稱添石七層共高一丈九尺二寸之處查六里石  
閘係雍正二年所建嗣於乾隆二年漕臣因閘面  
太低恐水溢時有碍糧船行走議請加高彼時河  
臣以該閘雖較上下各閘低矮但河形直下山水  
漲發溜勢湍急若再加石數層則衝急堪虞酌議  
於閘背用草加鑲數尺可資攔護推原從前籌辦  
之意既藉此閘座以擎蓄上游之水不肯加高以  
預備暢洩之路行之已久臣蘭第錫因該處爲韓  
莊德勝兩閘擎托關鍵必須加高始擎蓄得力而  
用草加鑲旋鑲旋衝未免徒費歲修固屬實在情



形但山水漲發宜洩亦不可不預爲籌備自應量  
加調劑庶不致彼此有碍臣等會商現在閘牆本  
有一丈零八寸今另行移建應連河底落低二尺  
共加石四層統計閘牆高一丈五尺六寸雖較上  
下各閘尙低數尺而核之現在各閘金門下板存  
水深者俱不過一丈有餘該閘既可收存水一丈  
三四尺爲數已屬相仿即使水勢加增不妨聽其  
漫板下注至閘座業已加高兩層有餘設遇盛漲  
恐不能如舊時暢達必須籌其去路該閘月河現  
在僅容一舟行走相度形勢尙可展寬四丈每年

水勢漲發時開放月河既可暢行而閘座亦可不致著重更無宣洩不及之虞其閘背加鑲草束亦即可停止實爲有裨無害奏入得

旨如所議行

公又奏言臣前於八月赴浙時自清口起經過淮揚一帶運河水勢均極充裕惟自淮安迤下至高郵州以上此一段河水僅深三四五尺不等近因各缺口及東岸涵洞滾壩概行堵閉水有收束臣此番於途間親看探量現在各該處水深業有七八尺至一丈不等未及一月而河底已刷深加倍

再經今冬明春清水淘刷河槽自更可寬深高堰誌椿現存水九尺七寸禦黃壩已做長一百五十餘丈束清壩已做長七十餘丈此時清口及會黃一帶水勢仍屬浩瀚臣已告知李世傑等將束清壩口門畱寬二三十丈以資流行庶西北風作不至高堰各工或有著重之虞俟司家莊漫口將近堵合再視湖水之消長進築攔蓄而就現在湖水而論明年重運經臨實足敷浮送斷不致復有阻滯至堵築漫工據李世傑等告稱所有黃河漫口四處除烟墩一處業經堵合斷流其李家莊一處

僅存口門一十一丈卽日亦可堵閉至司家莊漫口已做長一百餘丈因築壩進占斜帶挑溜現在溜勢已漸逼歸正河堵合尙不爲難按日計工九月內本可完竣緣上年淮徐等處被旱牛畜短缺料物不能由陸路多運徐屬船隻又少前咨豫省代僱船八百隻現止到二百餘隻料物未能堆積工程恐不能如期償辦然核計該工總可於十月初十以內堵築完竣不致再有稽延惟湯家莊地處下游徐屬所辦稽林運送該工程途更遠現飭將葦蕩營所產海柴先期採割堆貯水口撥運應

用計該工堵合之期較司家莊又須稍遲數日等語臣已面囑該督等務宜設法購運趕緊辦理俾漫工及早告蕝仰紓

聖主南顧之憂至臣所經淮揚各州縣俱經被水之區因本年附近豐收糧價極爲平減地方官現查勘災分分別賑卹閭里小民感戴

恩膏均不至失所甚爲寧謐再臣於拜摺後卽起程進京復

命奏入報

聞

十月初四日

公偕李世傑書麟李奉翰奏言查江省桃源境內  
河形從前由高家灣折至玉皇閣堤工前卽向東  
直至惠濟祠下會清東注近年以來順黃壩西北  
生有淤灘一道大河溜勢至玉皇閣堤工前卽逼  
向南厓靠厓抵順黃壩堤工木龍之後緊貼順黃  
壩向北折至陶莊新河始自西東會清歸海水勢  
紆折過多流行未免不能暢利勘至玉皇閣下河  
勢有向東北坐灣之處若於該處迎溜挑引河一  
道俾黃流從此直注順黃壩下木龍對過處所歸

入陶莊新河東注會清形勢較爲徑捷臣阿桂四十六年由浙江進京順道至江省查看河道時卽與前任督臣薩載及臣李奉翰會勘本欲商辦維時因豫工甫經堵合冀望河流通暢順黃壩淤灘可以自行刷去是以暫緩詎知兩年以來淤灘不能不能衝刷且向外更加增長以致逼溜南趨今年順黃壩工愈形著重生險臣李奉翰屢次派員於灘上抽挑引河并切嘴順勢奈隨挑隨淤不能得濟臣等遍加訪詢並將上游一帶誌椿水勢消長尺寸冊檔互相比較至上年伏秋黃水長發惟

桃源境內存水較高今年亦復如此未必不因玉  
皇閣一帶河勢紆迴所致自應於該處估挑引河  
預備明年大汛時開放倘開放後大河涵勢全掣  
由茲東注則順黃壩一帶埽工盡可淤閉自更妥  
善卽或一時未能全掣而伏秋盛漲有此分洩之  
路桃源以上河水可免存積逼高之病亦爲有益  
至該處雖係清河縣舊治本無城郭民居甚少今  
秋俱被水淹而自玉皇閣至中河南岸相去尙有  
千餘丈之遙所開引河果成黃流儘敷行走且中  
河堤工以南又有縷堤一道將來加高培厚并於



中間接築新堤四百九十丈即可作爲黃河北堤  
亦不致大滋勞費臣等公同履勘再四熟商意見  
相同已派員先行勘估所有引河計長七百六十  
二丈河頭口寬六十丈河身河尾口寬四十丈深  
八尺至一丈八尺不等約需銀五萬餘兩奏入

諭曰本日阿桂到京與李世傑等公同列銜具奏玉皇閣  
下河勢向東北坐灣迎溜請於該處挑引河一道俾黃  
流從此直注由順黃壩下木龍對過處所歸入陶莊新  
河東注會清形勢較爲徑捷等語此是極好機會卽當  
爲者著交李世傑等妥協辦理

命管理兵部事務

是月回京

是年四月第二孫那彥寶擢二等侍衛